

عمرو أبو الوفا

أول مارس

اسم الكتاب: أول مارس
تأليف: عمرو عبدالحميد أبو الوفا
الإخراج الداخلي: د. شيماء محمد أبوطالب
تدقيق لغوي: هدية علي
تصميم الغلاف: محمد علي
الطبعة الأولى: 2023
رقم الإيداع: 2022/ 23845
الترقيم الدولي: 1- 7 - 978-977-86399



مزاج الكتب

ج.م.ع

الإسكندرية

Email: mazagelkotob@gmail.com

لا يسمح بإعادة طبع الكتاب أو أي جزء منه أو تخزينه في نطاق استعادة المعلومات أو نقله بأي وسيلة من الوسائل سواء التصويرية أم الإلكترونية أم الميكانيكية، بما في ذلك النسخ الفوتوغرافية والنشر على أشرطة أو سواها وحفظ المعلومات واسترجاعها دون إذن خطي من الكاتب أو الناشر.

الاهداء

أهدي هذا الديوان ..

إلى أمي وأبي وأختي ..

إلى أبنائي عبد الله وعمر .

إلى حبيبتي .

إلى رفقاء دربي محمد كمال ومحمد اسمعيلوي .

إلى الخلقة المهندسة / سونيا جبران .

إلى روح الدكتور / صفوت شاكر بهنام .

إلى عزيزتي داليا منصور.

مقدمة

جميع ما كتبتة في هذا الديوان ليس من وحي الخيال، إنما هي تجارب حياتية قد تواجه الكثير منا، ليجد الإنسان نفسه ما بين مشاعر الحب، أو الخذلان، أو الغياب، أو العتاب، أو الشوق، أو الوداع، وقد تكون تجارب لأصدقاء. وهناك مشاعر لا يستطيع المرء التعبير عنها بالحديث ولكن يبقى الشعر هو الملاذ الأخير لكل إنسان للنجاة من قبضة مشاعره.. صديق تثرثر معه أو نافذة هروب.

حقيقة الأمر أنني لم أكن أنوي نشر ما أكتبه من شعر لأنني لا أبتغي من وراء النشر أموالاً أو شهرة، وإنما تستقر غايتي في توثيق ما أكتبه ليظل ذكرى لي في عالمنا هذا على نهج الراحل عبد الرحمن الأبنودي والدرويش عمرو حسن.

عمرو أبو الوفا

في غيابك

في غيابك عني مقدرتش أداري
كل اللي شافني سألني عن حالي
باين عليا سهر الليالي
وحاجات كتير شغلاني
وأهم حاجة فيهم إنك... وحشاني
في غيابك عني بدور في الوشوش
بقيت حد تاني واحد معروفش
تايه في صورة على الحيطَة محفورة
مبحهوش mood وده
في غيابك عني... أيامي
أيام متعادة وبلا داعي
أطلب قهوتي فتيجي في بالي
وأشوف صورتك في فنجالي
وأسرح فيها بخيالي
كإنك لسه قدامي
أكلم قهوتي عنك... يمكن تكوني سمعاني

وأول كلمة ينطقها قلبي على لساني
وحشاني
تبرد قهوتي فأطلب ثاني
في غيابك... تمن القهوة على حسابك
أنا مستني على بابك
أخذ تمن وحشة... دفعت تمنها بالغالي

غيايِك طال

غيايِكُ طال
ومقدرتش في لحظة أنساكي
عايش محتار
وبتمنى في يوم أَلقاي
في يومي وحيد
مع إنه فيه زحمة
وبدعي أكيد
أشوفك حتى لو لحظة
وشمس تغيب
وكون بلا واجهة
وليله كئيب
غاب قمره وساب عتمة
وبمشي طريق
بلا وجهة
زي غريب
وتاه من رحلة

غيايِك طال
وحاجات كثيرة بتتغير
وقلبي ما زال
في بُعدك لسه متحير
بقيت أعمى
عين مش شايفة حياة بدونك
وعين سارحة في مضمونك
غيايِك طال
وأنا أصبحت مجنونك

أول مارس

بكره أجمل يوم في مارس
فتّحت أجمل عيون
جوهرة وعليها حارس
شمس بتنوّر في كون
بكره أول يوم في مارس
وانتي أول كل شيء
زي الندى بيلامس
في الصبح صافي وبرئ
بكره أجمل يوم في مارس
لإنك جيتي فيه
شيء كان في اليوم ده ناقص
وانتي جيتي تكمليه
بكره أول يوم في مارس
لما الشتا أثره يضيع
سما ونجوم بتهامس
انتي زينة الربيع
باختصار... انتي أجمل ما في مارس

نفسى أقولك

مش لازم أقول إني بحبك
ولا حتى عارف أشرحلك
أنا بعمل اللي يوضحلك
إن أنا موجود
أنا نفسى أقولك والله
وأوصفلك وأحكي في أشواقي
وأزاي من غيرك أيامي
بتفوت في حدود
وجناين أحلامي
بتموت فيها ورود
أنا نفسى أقولك والله
على كل اللي بيشغل بالي
أنا نفسى تشوفي في أفعالي
وفابوعود
أنا نفسى أقولك والله
إنك ماشية في شرياني

ونفسي جوابك يجي في عنواني
في يوم موعود
أنا نفسي أقول إني بحبك
وإني بميل لك
وإني عمري ما أملك
لو لكلامي مفيش ردود
أنا نفسي أقول إني بحبك
وإني بقيت منك
وإني بآمنلك... لأبعد حدود
أنا نفسي بس تحسيني
وتشوفي الحب اللي في عيني
وتخطي بروح حافية على الجاي في سني

زهايمر

أنا لو جالي زهايمر
أنسى الدنيا ومنسكيش
أيوه أكيد هتغير
بس ازاي من غيرك أعيش ؟
ليكي حب كبير جوايا
وانتي ليه مبتحسيش
يمكن ما يبنش عليا
ولسان حالي ما بيحكيش
أنا لو جالي زهايمر
يمكن أتوه وأنغرب
ويمكن أبقى طفل صغير
وجوه حضنك أهرب
ما انتي الدينا بكل ما فيها
نظرة عينك بتحليها
وتخليني أعيش لياليها
وأصبر على المتقدر فيها

أنا لو جالي زهايمر
ومش جنبك وقريب
يمكن أعيش متحيّر
وأكون في الدينا غريب

من الآخر

هقولك كلمة من الآخر
في مارس قولت في الأول
أنا عايز معاكي أكمل
عمري للآخر
ساعتها قلبك اتاخذ
وأنا بطلت أتكلّم
ومرّت الأيام وأنا بقيت واخذ
أسرح فيكي وأتأمل
هقولك بقيت واحد
في بعدك بيتجمل
أبان وسط ناس
بضحك وبتكلم
وأنا والله من غيرك
بحاول أتحمل
هقولك وأنا وياكي
حالي بيتحول

ولو مفيش موضوع
بقصد كلامي يطول
هقولك كلمة من الآخر
أنا لسه بعيش مارس
وفاكر كل تفاصيله لحد الآن
في موج البحر
ولون السما في عز الظهر
وشمس الشتا بتدفع مهر
لربيع قبل الألوان
وفاكر برضه كمان
كل كلامي في الآخر

ممکن

هو ممکن حد يحب حد
من غير ما تتلاقى العينين
هو ممکن يبقى حب بجد
من غير لمسة إيديين
يعني يبقى الشوق ماليك
وتحس إنه هيبقى ليك
يكون ونسك في الحياة
ويبقى سندك وقت اه
حتى وهو بعيد عليك
يعني ممکن تحس بيه ويحس بيك
نظرة عينيه تحلي الدنيا ليك
يعني تلقاه وتلاقيك
وقت ما الكل باعوا فيك
يعني تجري تجيبه ورد
عشان تقوله بتحس إيه
ولما يجي عليك يرد

تداري وتخي عليه
هو ممكن يبقى فيه
حب بيلاوع كده ؟
ويبقى الحلو فيه
في عذاب بالشكل ده ؟
يعني مش زي ما قال
عمرو دياب في الأغاني
وإن الحب ليه يا حبيبي
شكل تاني

تسامحيني

وبقيت بحاسب في كلامي
وأمسك لساني
بخاف من كلمة مني
دموعك تنزل بيها تاني
وغصب عني بقصّر في الكلام
عشان متأثر باللي كان
عرفتك من كام يوم فاتوا
وكّاني عرفتك من زمان
لقيت راحتي في كلامي معاكي
بقيت بشتاق لرؤياكي
يومها كان هزاري سخيّف
شيطاني صورهولي ظل خفيف
سيبك من شيطاني وخليكي في هوا ملاكي
حاسبت يومها ودفعت التمن
قابلت الألم وأنا كنت نسيته من زمن
مسكت القلم وأخذني فيكي العشم
تسامحيني عشان نفسي تسامحيني بندم

مع الوقت

وعرفت إنه مع الوقت
كل حاجة بينا بتكبر
وإن إحساسي دلوقت
إن انتي ليا واني هقدر
وإن القلب بيكي متشعلق
وإن عمري بعمرك متعلق
وإنك وانتي بعيدة
على الناس بتخلق
وبنكر غيابك
وبكدب على نفسي وبصدق
وعرفت كمان
إني معاكي في أمان
وإن حبك جوه مني
وإن غيرتي عليكي
فاضل فيها شعرة على الجنان
وعرفت إني عارفك من زمان
وإني جنبك
وإن قلبك حاضني بحنان

الحب صبر

عايزك تعرفي
إن الحب صبر
والي يحب يصبر
مهما الوقت مر
عايزك تعرفي
إني مش ملاك
وإني يمكن أغلط يعني
فتمتقوليش تعبت معاك
كتر الوجد بيقسي
وجراح بُعدك تنسي
لو تسمعي وتنسي
والله ده اللي في نفسي

مبشبعش منك

مبشبعش منك
ولا من كلامك
حياتي في حضورك
واه من غيابك
مبشبعش منك
لاني في وجودك
بكسر حدودك
واه من جمالك
مبشبعش منك
ولا عندي طاقة
أتحمل غيابك
لاني ببساطة
وقعت في غرامك

ست البنات

مغلطتش لما قولت عليكي إنك... ست البنات
وإني نسيت بيكي كل اللي فات
وإن أي حاجة قبلك بقت ذكريات
وإن كلامي ليكي وحتى السكات
مالوش معنى غير إن قلبي فيكي مات
مغلطتش لما قولت عليكي إنك... ست البنات
وإني بحس معاكي بحاجات
محستهاش في عمري اللي فات
وإن فيسي وواتسي وشوية حالات
مش كفاية بهم أقول اللي نفسي أقوله في ساعات
مغلطتش لما قولت عليكي إنك... ست البنات
وإن بُعدي عنك مستحيل يكون من الاحتمالات
وإني بشوفك حلوة في عيني أي وقت من الأوقات
وإنك بتبقي حد جديد لما بقابلك في كل مرة من المرات
وإنك مالية العين نص وتلت أربع وتلتات
وإنك فعلاً... ست البنات

صوتك

كان أحلى يوم
يوم ما سمعت صوتك
ردت فيا الروح
بعد فترة مت فيها من غير ما أشوفك
وازاى يهل الشتا ومتكنش فيه ريحتك
فاتت أيام عليا حسيت فيها قيمتك
واليوم اللي اتفارقنا الشمس فيه غابت
ولحد هذا الوقت مطلعتش وكأنها ماتت
وكأنها حلفت ما تطلع غير في وجودك
عشان لما تضوي تنورّ خدودك
حتى الشوارع بتسألني فينك
والقطط اللي كان خوفك منها في عينك
والنقط اللي كانت بتلخص حنينك
كلهم كل يوم عنك يسألوني
وأما سكت كتمت في جفوني
وماتت إجابتي ودموعي في عيوني

ولما سمعت صوتك قلبي دق في ثواني
ورجعت الحياة تحلو من ثاني
ورجعت أحس حالي في شطر من الأغاني
ومين يا قلبي ينسى حبيبته الأولاني !

آخر يوم وياها

وكأنني بودعها
وده آخر يوم وياها
معرفش أنا ليه اخترت أبعد
مع إني بتنفس هواها
وازاي حسيت إن أنا هقدر
ومشيت ومقولتش حتى سلام
من امتي وأنا بقبل
أسيبها لوحدها للأيام
ولقيت نفسي فجأة مصدق
إني خلاص مجبور على البُعد
ودموعي نزلت وحزني لسه هيبداً
على أي أساس هعيش على الأرض
وازاي هنكمل من غير بعض
وصحيت فجأة
بكذب روعي على اللي عملته معاها
اتخيلت ازاي إني خلاص قادر أنساها ؟
وإن ده آخر يوم وياها

ورغم إنه خيال ومكنش حقيقة
لومت في نفسي كتير
وكأني عملت خطيئة
أنا أحلامي مبتكذبش
خايف يجي اليوم ومصدقش
إن ده آخر وياها
وعشان كده أنا قبل ما أنام
بتمنى الحلم ميتكررش
كنت عارف إن طريقنا طويل
وإنه يمكن مستحيل
بس وجودها كان جميل
رغم أي خلاف ما بينا
كان كفاية
إني أشوفها في الحكاية
ليها كان أيام معايا
مستحيل يوم أنساها
هي بطلة الرواية
من البداية للنهاية
حتى في آخر يوم وياها

لما قابلتك

لما قابلتك من أول نظرة روحي راحتك
ولقيت نفسي مرتاح نفسيًا وعشقتك
كنتي الحضن اللي بروحله لما بئن
كنتي الأم والزوجة والأخت اللي لهم بحن
حتى صحابي اللي كنت بسيب الدنيا وأهرب منها معاهم
لقيتك واحدة منهم وبشوفك فيهم وكأنك وياهم
حتى في شغلي كنت بشوفك وسط كتبي
بين الورق وفي شوية قلق
وفي أحلامي بشوف نفسي قدامك على ركبي
في أيدي وردي وانتي بتاخدي دليل حي
لما قابلتك

مش مكان وحدود

اللي بيجمعني بيكي

مش مكان وحدود

اللي ما بينا أكبر

وأحلى ما في الوجود

انتي العين والنني

وانتي كل التمني

وإن يوم بُعدت عنك

يبقى ربنا اختارني

تصدقيني... حبي ليكي

زي الربيع بعد الخريف

وإن قصتنا أكثر

من أي اثنين حبايب عرفهم التاريخ

وإن الحكاية يعني

مش كلام ووعود

وإنك حنة مني

والروح في بُعدك تموت

أنا عايزك تعرفي إنك ليا بأي شكل
والحقيقة إني بحبك وحي عمره يوم ما قل
وأنا معاك يوم ما زهقت ولا قلبي ملّ
كل يوم بحن ليكي ول غيابك شوفي حل

وجودك

وجودك في الحياة جنبي
بيطمّن وبيداوي أي جراح
ومش هقدر عليك أخي
حببتك ومش ذنبي
وفي البُعد مش مرتاح
وجودك في الحياة جنبي
بيدي طعم للحياة وإحساس
ومين غيرك معاه قلبي ؟
ده انتي عندي كل الناس
وجودك في الحياة فارق
حتى وانت بيعد
في البُعد عنك مش طابق
لكن عايش سعيد
لإن وجودك في ذاته... عيد
وجودك في الحياة
الدنيا ماشية بيه

زيك زي الهوا
اللي بعيش عليه
يعني وقت كلمة اه
وجودك بداري فيه
وتبقي ليا عكاز بسند عليه
وجودك بيفرق
لإني لوحدي مش هقدر
ومن غيرك حياتي بتقلق
وأبقى تايه ومتوتر
البُعد ياخذ من عمري كل يوم وأكبر
وأنا في البُعد ساكت ومش بنطق
ده أنا في وجودك
عيّل حلمه بيتحقق.

لآخر يوم

انتي أكيد تستاهلي أحسن مني بكثير
وأنا اللي مش هلاقي زيك في الدنيا دي
يمكن شوفتيني طيب وشوفتي مني خير
وأنا منك قريب لقيتك بيت كبير
بتحامي فيه ليالي وألجأ له وأنا حزين
وانتي بعيدة عني ببقى زي طير
هربان من القسوة وحاله بيبقى غير
بيني وبينك ذكريات وحكايات
وأماكن رحنا وجينا فيها بالساعات
بيني وبينك كلام وأحلام
ياما أنا وانتي شوفناها في المنام
يمكن في الدنيا دي ملناش نصيب
لكن هفضل أحبك
لآخر يوم الشمس فيه هتغيب
والقلب عمره ما يرق لحد غريب
ولا يعرف غيرك انتي حبيب

مجاوبتنيش

مجاوبتنيش

على السؤال اللي في عنيا

ما تبكيش

أنا راضي بالمكتوب عليا

أسف على كل دمة بكيها عينك

أنا السبب والذنب ذنبي والدين مش دينك

يا ريتني كنت داريت مشاعري وعرفت غيرك

يا ريتني قدرت أنسى وما سهرت ليلك

آخر كلام يجمعني بيكي

آخر نظرة من عيني ليكي

رسمت بيهم لحظة فراق

من غير ما عيني تيجي في عنيك

شوفت النهاية

جاية بتقرب من بعيد

والي جوايا

عذاب كان شديد

مش قادر أبصلك
من كثر دموع عنيا
وكننت بطمنك
في سؤالك عليا
مجاوبتنيش
ومش عايز إجابة
مش هعيش
في وحدة وكآبة
كل الحكاية إني وعدتك
إن الإجابة تكون براحتك
وأما سألتك
مفيش إجابة زي عادتك
حبيت برائتك
وأخذني وقتك
ومشيتي برضه من غير إجابتك

كنتي جاوبتي

أنا مش غالي عليكى !
سكوتك مش في وقته
ياما اترجيت فيكى
بلاش العند كرهته
أنا لو غالي عليكى
كنتي جاوبتي عليا
كان والله بإيديكى
بس عوايدك ديا
أنا لو ضاقت بيا الدنيا
هسكت وأنا متحير
وأوعي تلومي عليا
لما شوية معاكى أغير
ده أنا لو غالي عليكى
متسبنيش في الحيرة
كلامك على اللي بيكى
له معاني كتيرة

كنتي جاوبتي عليا
أعمل إيه في حياتي من غيرك ؟
ما أنا ليا مين في الدنيا غيرك ؟
كنتي جاوبتي عليا
أعمل إيه لما توحشيني ؟
وأحاول أقرب منك
وانتي تحوشييني

قرار

قرار هاخده وساعدني عليه
مفیش فايده أكمل ليه
عشان عارفني مش هقدر
أكون لغيرك هعمل إيه ؟
يا ربتي كنت قابلتك
قبل ما أكون مش ليك
نصبي إني عرفتك
ودوبت أنا فيك
قرار هاخده وساعدني عليه
غرام لازم يموت
عشان تعيش حاجات كتير
والوقت بينا يفوت
هنبعد والفراق مكتوب
قدرت علينا ظروف
هتفضل ذكرى جوه قلوب
قرار هاخده وقاتلني الخوف

عشان عارف أنا مش هقدر
ومن غيرك أنا متكسر
لو خايف تقوّل وداع
قولها وأنا مقدر
لإنك ماشي في وريدي
وكل مكان فيه ذكرى مبتسبينش
قرار هاخده ومش بإيدك ولا بإيدي
نصيب رافض لبعض نعيش
قرار ناخده ونقبل بيه

يوم ميلادك

النهارده يوم ميلادك
ويوم ميلادي يوم ما شوفتك
ميتحسبش من سني
غير سني وأنا جنبك
اتولدت يوم ما قولت إني بحبك
يعني النهارده مش زي أي يوم
شمس الدنيا يومها بتضحك من غير هموم
أمر للربيع يجي يملي الكون
وكل اتنين حبايب من غير عتاب ولا لوم
النهارده عندي زي كل يوم معاك
كل يوم وياكي عندي بيبقى عيد
زي العيال ببقى فرحان سعيد
وبسرح فيكي وبخيالي بروح بعيد

فستان أبيض

حلمت بيكي لابسة
فستان أبيض طويل
وصحيت من النوم فجأة
إحساس كان جميل
وكان حواليلي أصحابك... وأهلك وناسك
وكانت ابتسامة بتوصف هي حالك
وطرحة مطرزة بتزين فستانك
وتورته مدرجة مليانة بالشموع
وفرحة جواكي من غير قلق ولا خوف
وواحدة قريبة في عنيا كانت دموع
لكن فرحتها مشفتش زيبا ولا هشوف
وصحيت من النوم فجأة
إحساس كان جميل

ظلمت نفسي

أنا ظلمت نفسي معاها
شوفت بعيني ظلم هواها
خانت قلبي وضحت بيا
واتعلّمت فيا القسيسة
أنا ندمان... على حب زمان
كنت مسلم لهما بحالي
كنت بقول يا ربّتها مكاني
أنا مش عارف إيه قسّاهها
وايه خلاها
نسيت جبي وايه نسّاهها
عِشت كثير بتمنّى هناها
وأنا وياها شُفت جفاها
دوقت المر
أيامها كانت مش بتمر
طعم الغدر لسه في حلقي
بسأل قلبي كان فين عقلي

كنت بعاند... وقلبي مهاود
كنت بقول يمكن تتغير
عشت ليالي وأنا متحير
اتغيرت كتير علشانها
شُفت الويل والضعف قصاها
خدني حنين ويا ريته ما خدني
لما رجعت قلبها باعني
أنا مصعبتش لحظة عليها
وأنا بتكلم ودموعي قدامها
أنا هنساها وغصب عني
كنت بخاف واتحقق ظني
قلبها زاد في الجرح ظلمي
غدرها بيا قوام فوّقي
أنا حببت حد خدعني
كنت شاريه وهو بايعني
يمكن حزن كبير جوايا
بس أنا فوقت لما ظلمت نفسي معاها

اللي ضايقها

اللي ضايقها وزعلها

مش كلامي عنها

اللي ضايقها وزعلاها

إني لسه على بالها

وبتبعتم سلامها

مع أقرب أصحابها

وبان في سؤالها

قد إيه أشواقها

اللي ضايقها وزعلها

إني لسه على بالها

هي أكيد عندها حق

ولازم تتألم

بس أنا قلبي معاها دق

وجرح التانية معلّم

أنا عايزها تحس بيا

إن أنا لهما بس هي

تفهمني من عنيا
وتنسى حكايتي الأولانية
أيوه تغير عليا وأغير عليها
وأشيلها في عنيا ومن الدنيا أدارها
بقول حبيبتي هي وعمري كله لها
اللي ضايقها وزعلها
مش كلامي عنها
اللي ضايقها وزعلها
إني لسه على بالها
مش هتغير بسلامها
مش حياأثر فيا كلامها
يمكن هي الأولانية
بس قلبي معاها هي
يمكن كانت غالية عليا
لكن انتي مالية عنيا

الصورة

انتي اللي بتمناها
وانتي اللي عشت معاها
أجمل سنين حياتي
وليه نسيب البُعد
يفرّق بين اتنين ملهمش إلا بعض
وإن طال بُعدك عليا
أنا هستناكي شوية
يمكن تحني في يوم وترجعي ليا
بيننا حكايات جميلة
وأيام عشنا فيها
وسيرتك أحلى سيرة
لسه بشتاق لعنيكي
وبدور فيا عليكي
وأسهر على الصورة يوماتي
ياما حلمت بيكي
امتي ترجع لياليكي
وتكوني معايا ليلاتي

مهما كان الاختلاف

يا اللي عشقتك يوم
واتمنيتك ليا
هعمل إيه في اليوم
وانتي بعيدة عليا ؟
مهما كان الاختلاف
مش بنوصل للخلاف
كل واحد فينا خاف
ع اللي بينا في يوم يضيع
أنا اللي دايمًا مالي حياتك
وأنا اللي بقبل كل حالاتك
حتى لو إحساسك خائف
عشان قلبي برئ ومطيع
انتي همي واهتمامي
انتي دايمًا شاغلة بالي
كل لحظة بتبقى ليكي
وقت سكوتي وفي كلامي

مالية عليا حياتي
في كل وقت وحين
وبشوفك يوماتي
حبيبتي وأم ولادي
وبصبر مع الصابرين
انتي بكره
ولما يجي بكره
مش هسيبك تبقي ذكرى
انتي طول الوقت فكرة
دايمًا شاغلة بالي
واهتمامي بيكي فرض
مش مجرد يعني عادة
يعني حته مني وبالنسبة لي عرض
بغير وأخاف عليه تمليّ بزيادة
فمهما كان الاختلاف
مش هنوصل للخلاف

وأنا موجود

أوعي دموعك تنزل يوم وأنا موجود
أنا أداوي جروحك وأعديك أي حدود
عشان أخلي الضحكة ليكي تعود
وتبقي سعيدة وعد عليا من الوعود
لما دموعك تنزل يوم
اليوم يبقى حزين
ما يدوق جفني النوم
وكأنه هم سنين
لا يهدى ولا يرتاح البال
إلا وانتي بخير
يتغير حالي لحال
وأكون أحسن بكثير
لما أشوف في عينيك فرح كبير
يا اللي مالية عليا كل حياتي
وعد عليا أمني عليك كل حياتك
وأفضل جنبك حتى مماتي
وأعيش العمر معاك في كل حالاتك

مش عايز تصحى

عارفك مش عايز تصحى من النوم
علشان متعيش اليوم
اللي هيجي فيه حد ويملى مكانك
عارفك مهموم
وطايلك لوم
ما هو لازم تتغير أحوالك
وبتسأل بكره هتعمل إيه
والدنيا اسودت ليه
بيبان في عينيك
ولو خبيت في كلامك
بعدين مجهول
عايش لكن مقتول
طعنات في القلب ومين مسؤول
جرحك لو يتكلم هيقول
وكلامه في شرحه هيطول
وانت لسه

عايش تفاصيل القصة

عايز تنسى

ومش قادر تقسى

نغزات في صميم الروح

وروح بتروح

ولامتى هتفضل مع أسرارك مجروح

هتبقى وبها في يوم هتبوح

لإن باب السما مفتوح

زي الدم

أمي عندي أكيد أهم
ماشية فيا زي الدم
ربنا يخليها ليا
ويحميها من كل هم
حد عمره ما شاف دموعي
وسابني أمشي ولا اهتم
مهما رحت ومهما جيت
هي عندي أكيد أهم

عبد الله

نفسى أشوفك وألمحك قدام عنيا
نفسى تكبر وتترى بين إيديا
عبد الله يعنى حاجة حلوة فيا
لما أموت تستنى ذكرى ليا
نفسى أشيلك على كتفى
وأمشي بيبك وسط الناس
وأما أكبر حضنك يدفى
وتبقى زلي في الإحساس
نفسى أسمع كلمة منك
بابا تملئ الدنيا ديا
مش هبطل أحكي عنك
حتى وانت بعيد عليا
عبد الله إنت أحلى حاجة فيا
لما أموت تستنى ذكرى ليا

متغيرين

متغيرين... مجبورين على التغيير
وبنعمل أنفسنا إننا لسه بخير
مفيش فايده كل حاجة بتروح
وأنا مش بإيدي
ولا باقي فيا غير حلاوة روح
متغيرين... مجبورين على التغيير
حاولنا كتير وتعبنا التفكير
فاتفقنا على الفراق
من غير أي اتفاق
كل واحد فينا حاول
ومن أحلامه فاق
مش هلوم نفسي ولا ألومك معايا
كنت حابك ودي كل الحكاية
حلمت ياما معاكي أكون
أحسننت بالله الظنون
وفي النهاية اللي عايزه ربنا بيكون

بيني وبينك

بيني وبينك سنين وعيال
دلوقتي بينا مسافة بالأميال
وبين الحال والحال
حبيت حاجات ونسيت حاجات
ولقيت سنين من عمري فاتت
وحاجات حبيتها فيك في عنيا ماتت
قالولي الحب صبر
والي يحب يصبر مهما الوقت مر
حاولت... وكثير حلمت
أحافظ على اللي بينا
لقتني في طريق وانت في طريق
يا ترى مين جاني ومين برئ
في حكايتنا

أحلامي معاك

أحلامي معاك بنيتها
وانت بإيدك هديتها
كثير استنيتها
تتحقق وأنا وياك
كنت أناني
سببني وحداني
هديت أحلامي
اللي بنيتها معاك
أحزاني معاك حسيتها
جيت على نفسي وعديتها
جراح قلبي صحتها
على اه وكلمة وداع
أحلامي معاك راحت
ودموع نزلت وارتاحت
أشواق جويا ماتت
أيام ما بينا عليك هانت

وصحيت من وهم وضياع
هنسى أحلامي معاك
وهعيشها مع غيرك
مش هحتاج لهواك
هتيجي في يوم ندمان
وواجعك ضميرك
هشوفك هوا ودخان
وأدور وشي وأمشي وأسيبك

مجاش في وقته

سؤال بيوجع قلبي
دايمًا كل يوم
عايز أسمع صوتك
وليه منك أكون محروم؟
ضحيت كتير عشانك
وبستحمل فراقك
وبدعي وأقول يا رب
إني أكون في بالك
ما بينا حاجات كتير
ولبُعدك أكيد تأثير
لكن قلبي راضي
طول ما انتي بخير
سؤال بيوجع قلبي
دايمًا كل يوم
ليه مكتوب عليا؟
أعيش شايل هموم

فراق مجاش في وقته
ومعملتش حسابه
وكل يوم بدونك عشته
بيكويني بعذابه
يمكن تكوني بعيدة
بس فاكرك مش ناسيكي
مع ناس ولا وحيدة
روحي طيف حواليلي
سبتيني للياللي
والشوق سهران ياللي
وكل اللي وجدته
سؤال بيوقع قلبي
وفراق مجاش في وقته

أوعي تسبيني

أوعي تسبيني وتمشي
أوعي تقولي كلام
يمكن أنا مقدرشي
أنسى مع الأيام
عمرك ما هُنّتي عليا
ولا بعدت عنك يوم
صعبة الدنيا ديا
من غيرك أكون محروم
ومهما كان البُعد
يا ريتك تبقي عارفة
أنا وانت لي بعض
ليه يا حبيبتي خيفة ؟
دايمًا بفكر فيكي
وفي قربك أنا بتهنى
لما بشوف عنيك
بشوف فيهم الجنة

قبل النهاية

مش هي دي النهاية
اللي كنت بحلم بيها
راحت أجمل حكاية
وراحت كمان ليالها
أنا اشتريت... وهي باعت
أنا حبيت... وهي خانت
أعيش معاها اتمنيت
عاشت هي ونسيتني
ناديت كثير واترجيت
لكن هي ولا سمعتني
مش هي دي النهاية
اللي كنت مستنيتها
زمان كانت معايا
لكن هونت عليها
مش هسامح مش هاقدر
الجراح في قلبي بتكبر

يمكن غيرك حبيبتي يقدر
ينسيني المقدر
عشت معاكي في غربة
وانتي شوفتيني لعبة
ولما زهقتي منها
رميتها جوه علبة
انتي كنتي لي دبة
قتلت صاحبها
كل بداية وليها نهاية
وأدي آخر الحكاية
وأهي النهاية بتقرب
شايفها جاية من بعيد
وأدي الحب بهرب
قبل ما يموت من جديد

سِر

أنا عايز أقولك على سر
حضنك عندي بالدنيا
مش عايز أيامنا تمر
إلا وتكوني انتي ليا
ده الحلم اللي أنا بتمناه
وبكره اللي أنا بستناه
وأنا عايز أقولك من تاني
على سر كبير جواني
مبقتش أشوف غيرك انتي
ولا غيرك انتي بيشغل بالي
وعارفة كل ما أقابلك
عيني ما تشوف إلا ملامحك
وبقيننا أنا وقلبي بنحتاجلك
أنا عايز أقولك علانية
انتي اللي في البال والنية
وانتي أسراري المستخبية
وجايز تكون بينا حواجز
لكن عايز
تبقي نصيبي في الدنيا

حبك

اخترتك من البداية تبقي ليا
واتمنيت كثير ترضي عليا
ولو يرجع زماني
هختارك من تاني
ما انتي الحبيب الأولاني
ونار الشوق أقوى من الفراق
ويا ما انكوى بيها كثير عشاق
والي فر منها داق وعاش في ابتلاء
محبتش غيرك... وسهرت ليلك
ولما بحلف بشهد ضميرك
ضعفت في رحيلك
وعشت في تلاهي
مشفتش مثيلك
رغم اللي عشته معاكي في مآسي
وحبك ده توب متفصل مقاسي
وكأنه طوق فيه نجاتي وخلاصي

القلب وما يعشق
وأنا عشقتك خلاص
قلبي باسمك ينطق
لأنه كله دفا وإحساس
كل الكلام اتقال
لكن لسه كلام القلب
حبك مالوش مثال
وكأني بتوب عن ذنب

الهروب

في آخر لحظة غروب
في آخر يوم هعيشه معاك
مكنش فيه إلا الهروب
عشان أقدر أنسى هواك
لإني طول ما أنا قريب
هموت أكيد بالبطئ
صبرت عشان جوايا طيب
وحبي ليك كان برئ
قليل الحيلة كان حالي وأنا وياك
مبقتش عارف حبك شيطان ولا ملاك
قولت أروح بعيد
قولت خلاص هنسأك
ومهما رحت بعيد
فاكرك ومش بنسأك

نهار حبك

شمس يومه بتشرق
لكن على غير عاداتها
نهار الصبح بيشقشق
وكأنه منمش ليلتها
كل البشر نيام
حاسدهم على راحتهم
بتمر عليا أيام
مش قادر على مواجههم
يا ريتك حاسة باللي جوايا
وشايفة إني بتغير
نهار حبك ساطع وبينور
دخل لي من شباك صغير
صحاني من ثبات الماضي
خلاني عليكي أدور
بقول جازر تسامحيني

على أيام عدت مكنتيش فيها
وتسيبي الوقت يثبتلك
إنك منى عيني
وإن حبك أرض برومها
وتمدي إيدك تشديني
وتبقي حكاية برومها
في كل دواويني

الوضع الحالي

غريب الوضع الحالي
لما قابلتك صدفة
وليه اتغير حالي
وبان عليا اللهفة
مع إن يوم ما ودعتيني
وقفلتي الباب بلا رجعة
وقولتي إنك هتنسني
وإنك رايحة ومش راجعة
فضلتي تخسريني
وأديني خسرتك فجأة
يومها كان الوجع بـ100 وجعة
سبتيني زي أب وتاهت منه طفلة
معملتش حسابي تغيبني عن الحفلة
غريب الوضع الحالي
وليه لسه في مكاني
وليه حياتي بقت واقفة

مع إن فات ليالي
خدتني الدنيا 100 لفة
بقيت زي ديوان
بدون توقيع
وحبك بقى إدمان
ومن غيرك بضيع
بقيت غنوة بدون توزيع
وزيك زي بحار اتخلي عن الدفة
وأصبح مركبة بلا مواني
بدون شط ولا مرسى
وصار حاله من حالي
أنا الوضع الحالي
بدفع تمن وحشة

بيني وبين قلبي

حديث داير بيني وبين قلبي
بحاول أفضفض على المستخبي
وبوصف حالي بالمللي
وأشوف إيه اللي فاضلي
عشان تحسي باللي جوايا
كلام الشّعر له نهاية
ومش كافي على الأشواق
وشرب القهوة كان مقدم صداق
في بند العلاقة بعقد اتفاق
فوارد ترديه وقت الخناق
ووارد أكون خصمك
مشاعري بتحلفلك
على تنفيذ وعودي
مش هبطل أكتبلك
لحين تعودي
وتكوني شمس في سطوعك

وتشدي عودي
يبقالي جزء في ضلوعك
تبقيلي سبب في وجودي
أنا نفسي تبقيلي دولة
وأبقى من رعاياكي
وتكوني انتي المحاولة
اللي بيها أخطى حدودي
وألاقيني في لقاكي
بتفتّح ورودي
فعليا متستكتريش
أجي وأستنى في مواعيدك
أنا يمكن بعيش
في انتظاري لبريدك
وبهمون عليا إني لسه بريدك

حرب

ما بين ضياع الوقت
وبين كلمة استني
أنا فضّلت
أكون وحدي في شيل همي
ودارت حرب
ما بين العقل والقلب
واحد بتوحشيه
والثاني رافض القرب
ف ليه بتحوشيه
وهو كان ليكي أب ؟
في كل ليلة حاولت
أحوّش دمعي
بلاقي الدمع يسرقني
يقوم القلب يسألني
فينك ؟
عشان أجيلك
تمسحي دموعي بمنديلك
فيصحي العقل يفكرني

بكل كلمة قولتها
وتبقى الذكرى اللي تمنعني
أفكر تاني فيها
في كل حرب
لأزم يكون فيه ضحايا
يا إما تغيبني يا إما تكوني معايا
وماشي في درب
لحد الآن ما له نهاية
وبدعي يا رب
تحسي باللي جوايا
فمهما عافرت
بكون مهزوم
ولا قدرت
أنساكي في يوم
وأعذب نفسي من اللوم
لما تغيبني عن بالي
ما انتي اللي بقيالي
وانتي اللي شغلاني
وانتي أول حد قلبي حب
فكفاية حرب

الحقيقة

أخيراً قـولت الحقيقة
وارتاح قلبي من الضيقة
وشيلت الهم من على كتفي
لـقـيتك هادية ورقيقة
بتسمعيـني دقيقة ورا دقيقة
سـكـوتك بس كان يكفي
عشان أحس إنك فهمتي
ونظرة عينك اللي بتدي
بتقول إنك سامحتي
ساعتها لـقيت راحتي
كأنك طبطبتني على كفي
خسرت حاجات كتير
وكان صعب تكوني منهم
لـقـيتك بيت كبير
وأنا وقلبي عيال بيجمعهم

رميت سري في بير
عشان خوفت أضيّعهم
وأما قولتي حصل خير
كإنك حاسة بوجعهم
وأنا والله يكفيني
إنك سمعتيني
وكتر ١٠٠٠ خيرك
إنك فهمتيني
ده لما سمعني غيرك
غيرك ضحى بسني
وسابني في ظروف
بعاني من الخوف
ولا قلب عطوف
يدفيني
فاعملي معروف
سيبك من الجزء المحذوف
وداويني

من الجرح المكشوف
وابقيلي
الناي والنوتة
وأنا أبقى اللحن المعزوف
أنا نفسي تكوني البنوتة
وأبقالك بطل الحدوتة
والناس تشهد وتشوف

بتوحشيني

يوماتي بسهر على نواح الناي
ونوم رايع من التفكير
أنا لسه كنت معاكي بتوحشيني ازاي
سؤال مالوش تفسير
وشرب القهوة بقى كثير
ومهما بكتب شعر
الشعر عاجز عن التعبير
أنا كل يوم بقر
بنعمة وجودك
غيابك مضر
ومقدرش أفوتك
بتوحشيني
في كل غياب
وبتخليني
دايمًا فاتحلك باب

عشان تدخل مني
ويرتاح قلبي من ظنه
انتي زي الشتا
بيوحشني في الصيف
بكون في حالة رضا
وكأني عندك ضيف
بتوحشيني بالفطرة
وأنا على الحال ده من فترة
وبتشبهي المطرة
بتغسليني من الذكرى
انتي في قصتي البطلة
وصورتك وحدها على الأفيش
وانتي الحاجة الي فاضلة
في حياتي عشان أعيش
فلو غبتي عني بعمل cut للمشهد
وأقص غيابك من المونتاج
بعيش لكن بجسد مجهّد

كأنني لوحة لسيارة هالكة بجراج
مشاعري بدونك مقابض بلا أبواب
وأما أسألك بعتاب
بلاقيني... بكتب بتوحشيني



ج.م.ع
الإسكندرية

Email: mazagelkotob@gmail.com

Mobile: 01024541339